

EB-IU

Anguitak analisi «sakon eta lasaia» eskatu du euskal gatazkari aurre egiteko

Joseba Arruti | BILBO

Izquierda Unida koalizio-ko (IU) koordinatzaile nagusi ohi Julio Anguitak globalizazioaren eta ezkerren etorkizunari buruzko bi hitzaldi eman zituen atzo Bilbon, eta horiei ekin aurretik kazetarien aurrean agertu zen Javier Madrazorekin batera.

Azken honek «gezurtizat» jo zuen Jose Maria Aznar Espainiako Gobernuko presidentea euskal gatazka bide polizialek konpon daitekeela esateagatik, eta «jada pentsamendu totalitario bihurtu den pentsamendu bakarrarekin bat ez datozenak PPK txikitu egiten» dituela salatu zuen. Halaber, dei berri bat egin zien PSE-EEko baseei «alderdi horretako zuzendaritzak frankismoaren oinordeko diren PPKoei egiten dien segidismoaren aurrean altxa daitezen».

Anguita: «Histeria eta hilketak, alde batera»

Julio Anguitak ez zuen Euskal Herriko arazoan eta egungo egoera politikoan sakon sartu nahi izan, «IUren politikaz hitz egiteko koordinatzaile nagusi berria dagoelako». Hala ere, Euskal Herriko bizitza politikoan sumatu duen «irrazionaltasunaren» aurka agertu zen, eta «analisi sakon eta lasaia» egitera deitu zituen eragile guztiak.

Hala, PPren zein ETAren aurka jo zuen Anguitak, «histeriaren eta hilketen gainean ezin delako ezer eraihi». Horren aurrean, IUren «jarrera arrazionala» aldarrikatu zuen, «zenbait hedabidek hori ontzat jotzen ez» dutela salatuz. Bestalde, ezker abertzaleari ohartarazi zion «gauzak goma biarekin edo tiroekin inposatu nahia ezkerrearekin bat ez» datorrela.

Amaitzeko, PSE-EEren jokabidea izan zuen hizpide Julio Anguitak. Alderdi sozialistako zenbait buruzagik EAEn iragarri duten «belusezko iraultzaren» aurrean, «horrelakoak Corte Inglesen baino egiten ez» direla erantzun zien.

PP. Espainia mailako PPren hautes-batzordeak gaur baietsiko du

EAEko PPK Mayor Oreja proposatu du alderdiaren lehendakari izateko

Iturgaitzek PP-PSOE Eusko Jaurlaritzaren aldeko aldarria berretsi du

Efe | MADRIL

EAEko PPren hauteskunde batzordeak Jaime Mayor Oreja Barne ministroa proposatu zuen atzo maiatzaren 13ko hauteskundeetan alderdi horren lehendakari izateko. Mayor Orejaren hautagaitza PPren Espainia guztirako hauteskunde batzordeak baietsiko du gaur ofizialki. Aipatu batzorde horrek datozen asteotan erabakiko ditu EAEko hiru herrialdeetako zerrendaburuak.

Carlos Iturgaitz EAEko PPKo presidenteak prentsaurrekoa eman zuen atzo eguerdian Madrilen, Mayor Orejaren hautagaitzaren inguruko proposamenaren berri emateko. Bere iritziz, Barne ministroaren hautagaitza EAEn «alternantzia benetakoa izateko bermerik onena da». «EAEn guztion eskubideak eta askatasuna bermatzeko eta esparru juridiko-politikoa defendatzeko aukera onena da», esan zuen Iturgaitzek.

Bere berbetan, EAEko PP Mayor Orejari sostengua adie-



JOSE HUESCA / EFE
Jaime Mayor Oreja.

razteko «bat izango» da eta «gehiengoa lortu eta gobernatzeko ilusioz eta sendotasunez» jokatu dutela erantsi zuen.

Iturgaitz: «EAJ oposiziora joatea beharrezkoa eta ona da»

EAEko PPKo buruzagiaren aburuz, «beharrezkoa eta ona» izango litzateke EAJ oposiziora joatea, «hiltzaileen eta hiltzaileen konplizeen eskuetan saldu gintuzten itun lotsagarriei buruzko hausnarketa egin eta jarreraz aldatzeko denbora izan

dezan». Halaber, Carlos Iturgaitzek jeltzaleei egotzi zien EAEn «guztiok EH eta ETAren eskuetara jaurtitzeko oso dinamika arriskutsuari» ekin izana.

PSE-EErenganako jeltzaleen hurbilketa bati buruz Arzalluzek asteburuon esandakoak hizpide izan zituen Iturgaitzek bere agerraldian: «Nicolas Redondok argi utzi du zer duen gogokoen eta nik ez dut hark esandakoa zalantzan jarriko», azpimarratu zuen.

Iturgaitzen arabera, EAJk «badaki bozak galduko dituela eta beldur eszenikoa dauka». «PSE-EErenganako hurbilketa eta EHrekin berriz bat egiteaz egiten dute berba jeltzaleek eta hori ez da bateragarria», Iturgaitzen irudiko. Horren aurrean, PPK norekin gobernatu nahi duen argi esaten duela nabarmendu zuen: «euskaldun guztien eskubideak eta askatasuna bermatzen dutenekin».

Mayor Orejaren hautagaitzak Iñaki Anasagasti EAJko diputatuaren berehalako kritika jaso zuen, «EAEn bizi ez eta bertako arazoetatik urrun dagoelako».

EH. Udalbiltzan hartutako erabakien balorazioa egin zuen Arnaldo Otegi

«Aznar eta Mayor Orejaren finikito politikoa izango da abian jarri den prozesua», dio Otegi

Ainara Olano | DONOSTIA

«Euskal Herriak martxan jarri duen prozesu demokratikoa, burujabetzaren aldekoa, Jose Maria Aznar eta Jaime Mayor Orejaren finikito politikoa izango da», esan zuen atzo Arnaldo Otegi Usurbilgo Herrikoan egin zuen agerraldian. Otegi uste du «beraien karrera politikoa Euskal Herrian amaitu» egingo direla «Euskal Herria ez delako izango Espainia». Adierazi zuen: «Euskal Herria estatu izango da Europan eta hori oso garbi esan nahi diogun mezua da, azken finean, gutxienez aurretik jakin dezaten Euskal Herriak martxan jarri duen prozesua azken muturreraino eramango dutela».

Otegi «beraien burua» zoriondu zuen Udalbiltza bezalako

instituzio nazionalaren «eraketa eta garapenagatik», eta «ehunka hautetsik, Euskal Herriaren osotasunean, hartutako konpromisoagatik».

Otegi Udalbiltzaren inguruan esan zuen: «larunbatean ehunka hautetsik Euskal herriak behar zuen eztabaida politikoa egin zuen, herri hau Europa mailan nola kokatuko dugun erabakitze».

Aznarrek aste-bukaera honean Gasteiza egin duen bidaian esan du Euskal Herria «Espainiaren baitan» beti izan dela «garrantzitsua» eta hala izaten jarraituko duela. Horren aurrean Otegi esan zuen «Hego Euskal Herriak Espainia izaten jarraitzen» duela Espainiako Gobernuak «indarkeriaren eta konstituzioaren bidez» inposatzen diolako.

«Indarkeria horren izaera guztiz antidemokratikoaren parean ezker abertzaleak gure irtenbide eta alternatiba demokratikoa jarri nahi dugu. Guk planteatzen dugun alternatiba demokratikoa da, espreski euskal populuak erabakitzea zein motatako harremanak nahi dituen Espainiako Gobernuarekin, eta beraz, demokraziaren ikuspuntu horretatik euskal herritarrek erabaki behar dutela, lehenik eta behin ze motatako harremanak nahi dituen Espainiarekin, inongo ingerentzia eta bortizkeriarik gabe», adierazi zuen Otegi.

Hori da bere ustez bi alternatiben artean dagoen ezberdintasuna, bata «indarkerian» oinarritzen dela, eta bestea, «euskal herritarren borondate askean».

EPAIKETA

Zortzi gazte epaitu dituzte Iruñean prozesio batean «istiluak» sortzeagatik

Irene Arrizurieta | IRUÑEA

Zortzi gazte epaitu zituzten atzo Iruñeko Entzutegian (Mikel Auza, Freiso Pequeño Jorge Olaiz, Iban Medina, Nerea Moreno, Iñaki Beaumont, Ainara Gorostiaga eta Jose Maria Urbiola), 1999ko Done Saturdiren prozesioan «istiluak» eragitea leporatuta. Aipatu gazteak *Euskal presoak Euskal Herrira* zioen pankarta batekin atera ziren prozesiora.

Fiskalak «ekitaldi bat galarazteagatik» sei aste-buruko atxiloketa, eta 15.000 pezetako isuna eskatu zuen akusatutako bakoitzarentzat. Gazteen abokatuak haien errugabetasuna aldarrikatu zuen gertakariak preskribitu dutelako. Epaiketa eta gero istiluak egon ziren. Atarian gazteei elkartasuna adierazten ari zen taldea, Beaumont, Soto del Realetik deklaratzera ekarritako gaztearengana hurbiltzean Espainiako Poliziak kargatu egin zuen.

'BASAJAUN' KASUA

Auzia berriro irekitzeko eskatu du Etxarri-Aranatzek

Ainara Olano | DONOSTIA

Etxarri-Aranazko Udalak otsailaren 5eko udalbatzan ahobatez onartu zuen Josu Zabala Salegi *Basajaun*-en auzia berriz ere irekitzeko eskatzen zuen idazki bat bidaltzea, familiaren proposamen gisa.

Eibarko epaitegiak eta Herrialde Auzitegiak kasua ixtea erabaki ondoren, orain, Auzitegi Konstituzionalean dago. Udalak auzitegiak helegitea onartzea eta gero ikerketa berriro irekitzeko erabakia hartzea espero du.

Bestalde, postal batzuk egiten ari dira herritarrek Konstituzionalaren aurrean beraien jarrera azaltzeko, bai maila indibidualean zein talde moduan, beraien babesa frogatzeko.